

H1N1: Usim saring pelajar 10 hari

PERIKSA...
Dr Junaidah memeriksa suhu badan salah seorang kakitangan Usim.



PENULARAN wabak Influenza A (H1N1) kian membimbangkan dan sehingga kini, ia mencatat 72 kematian.

Justeru, atas rasa prihatin dan tanggungjawab, Unit Kesihatan Pelajar, Universiti Sains Islam Malaysia (Usim) mengambil langkah pencegahan dengan menjalankan pemeriksaan saringan H1N1 di setiap jabatan.

Pemeriksaan selama 10 hari itu dimulakan di Bangunan Canselori, membabitkan Jabatan Canselori, Bendahari dan pendaftaran sebelum diikuti fakulti dan pusat pengajian.

Pegawai Perubatan Unit Kesihatan Pelajar Usim, Dr Junaidah Abd Wahab, berkata pemeriksaan saringan H1N1 itu inisiatif Unit Kesihatan Pelajar memandangkan penularan wabak itu semakin serius.

Menurutnya, walaupun penularan H1N1 di Usim masih terkawal, langkah pencegahan perlu dijalankan.

"Pemakaian topeng muka sangat penting terutama mereka yang mempunyai tanda-tanda wabak itu.

"Komuniti kampus keseluruhannya perlu mengamalkan batasan pergaulan di samping menjaga kebersihan diri dengan baik bagi mengelak penularan H1N1," katanya.

Selain melakukan pemeriksaan suhu badan, semua kakitangan akademik diarahkan memperuntukkan beberapa minit untuk memaklumkan langkah pencegahan dan kawalan H1N1 kepada pelajar sebelum memulakan sesi pembelajaran.

"Ini bagi memaksimumkan penjagaan kebersihan diri dan peka kepada tahap kesihatan pelajar bagi mencegah penularan wabak itu.

"Alhamdulillah, daripada pemeriksaan itu, warga Usim didapati sihat dan tidak membimbangkan," katanya.